



Prot. N. 1091/19/I



## BEATISSIME PATER

Michaël Farrugia, Procurator Generalis Ordinis Carmelitarum, suas libenter faciens preces Ferdinandi Millán Romeral, Prioris Generalis eiusdem Ordinis, debitae oboedientiae et filialis venerationis sensus Sanctitati Tuae ex animo pandit et fiducialiter exponit, vertente anno octingentesimum expletum iri anniversarium ex quo Alicatae, in Sicilia, Sanctus Angelus Hierosolymitanus, ex Ordine Carmelitarum, ob defensionem catholicae fidei ab haereticis trucidatus est.

Ad felicem illum eventum rite celebrandum, peculiares sacrae functiones et varia spiritualia incepta usque ad diem V Maii MMXXI in quolibet habebuntur templo Ordini Carmelitarum spectante, eo intento fine ut salutaris devotio erga Sanctum Angelum Hierosolymitanum promoveatur in fidelibus et, ipso auxiliante, eorum mores impensius divino Evangelio conformatur.

Quo autem abundatius fidelibus, qui dictis celebrationibus intererunt, divinae gratiae thesaurus aperiatur, Rev.dus Orator sacrarum Indulgentiarum donum a Sanctitate Tua implorat. Et Deus, etc.



Die V Maii MMXX



PAENITENTIARIA APOSTOLICA, de mandato Summi Pontificis, plenariam libenter concedit Indulgentiam, suetis sub condicionebus (sacramentali Confessione, eucharistica Communione et oratione ad mentem Summi Pontificis) a Patribus ex Ordine Carmelitarum omnibusque christifidelibus vere paenitentibus ad instar iubilaei lucrandam, quam etiam animabus fidelium in Purgatorio detentis per modum suffragii applicare possint, dummodo Sancti Angeli Martyris Sanctuarium de Alicata et Matricem ecclesiam Fani Sancti Angeli de Muxaro, Agrigentine Archidioeceseos, necnon quodlibet templum Ordini Carmelitarum spectans vel Sancto Angelo Hierosolymitano dicatum inviserint et iubilaribus celebrationibus peculiaribusque circumstantiis, ut in supplicibus litteris nuper porrectis, devote interfuerint vel saltem coram Sancti Angeli exuvii per congruum temporis spatium piis vacaverint considerationibus, concludendis Oratione Dominica, Symbolo Fidei, necnon invocationibus Beatae Mariae Virginis et Sancti Angeli Hierosolymitani.

Fideles senectute, morbo vel gravi alia causa impediti, pariter plenariam consequi valebunt Indulgentiam si, concepta detestatione cuiusque peccati et intentione praestandi, ubi primum licuerit, tres consuetas condiciones, coram aliqua Sancti imagine anniversariis functionibus se spiritualiter adiunxerint, precibus doloribusque suis, vel incommodis propriae vitae, misericordi Deo per Mariam SS.mam oblatis.

Quo igitur accessus ad divinam veniam per Ecclesiae claves consequendam facilior pro pastorali caritate evadat, haec Paenitentiaria enixe rogat ut Patres ex Ordine Carmelitarum prompto et generoso animo celebrationi Paenitentiae sese praebeant ac S. Communionem infirmis saepe ministrant.

Praesenti pro hac vice tantum valitudo. Contrariis quibuscumque minime obstantibus.



*Maurizio Card. Piacenza*  
MAURIZIO Card. PIACENZA  
Paenitentiarius Maior

*Christophorus Nykiel*  
CHRISTOPHORUS NYKIEL  
Regens